



Шочмо эл, порылык да чын верч!

Будь готов /

2-шо (3650) №,
2024 ий 12 январь,
кугарня.



0+

1933 ий 1 февраль годсек лектеш.

«Чолга шўдыр» – Пампалчын унаже



Фотом школ архив гыч налме.

Шочмо кундемын эртыме корныжым радамлаш, кугезе йўлам аралаш, марий пайрем-влакым шымлаш кумылангыме шонымаш дене тўрлў конкурс ден проект эртаралтыт. Советский район Ургаш лицей Марий Эл Республикысе Образований да науко министерстве дене пырля «Пампалче деке унала» республикысе сетевой тунемме проектыш 1-4-ше класслаште тунемше-влакым ий еда уша. Эртыше ийын ты проект Шорыкйол пайремлан пўлеклалтын. Тўрлў район гыч 20 команде танасен. Йоча-шамыч коман-

дышт дене палымым ыште-ныт. Васликува ден васликугызан вургемыштым чиен, Шорыкйол йўла дене палдареныт. Пайрем сийым ямдыленыт. Танасымаште эн шуко баллым Советский район Ёрша школын «Чолга шўдыр» командыже (**снимкыште**) поген. Йоча-шамычым туныктышо-влак Р.Г.Антропова ден Т.Н.Нагаева ямдыленыт.

– *Тыгай проектм эртарыше-влаклан таум ойлена. Паша моткоч пайдале лийын, –* ойла Роза Геннадиевна. – *Йоча-шамыч шуко ум пален налынтыт, атыр материалым кычалы-*

ныт, ача-ава, коча-кова-влакым кумылангыденит. Ончыкыжым вес йўлам шымлаш шонат. Келшен, икте-весым умылен пашам ыштымышын лектышыже эре куандарыше лиеш.

Л.ГРИГОРЬЕВА.

ЛОТЕРЕЙ

Подпискым ыштыше-влак коклаште **лотерей** модыш эртаралтеш.

Тўн приз – 3D ручка.



Квитанцийым але копияжым редакцийыш колтыман.

13 январь — Российысе печать кече.



Тўшка увер средства-влакын, полиграфий предприятийлан пагалыме пашаеңышт, журналистикын ветеранже-влак!

Тендан пашада тыршы-машым да усталыкым, чынлыкым да чон йўлы-машым йодеш. Те республикыште илыше калык-лан кўлешан увер-влакым жапыштыже намиен шуктеда, тўрлө неле йодышым рашемдаш

полшеда, икоян шонымашым шочыкташ йўным ыштеда.

Тачысе саманыште медиа паша поснак аклалтеш. Россий Федерацийын Президентше Владимир Путин тўшка увер средства-влакын пашашт ончыл верым айллат, российысе обществом икояным ышташ полшат манын палемден.

Чын пашаланда, икте-весым умылен моштымыланда, кўкшө лектышыш шуаш тыршымыланда, земляк-влаклан полшымыланда кугу таум ойлем.

Усталык шўлышым, пашаште у кўкшытыш шуаш да онай проектам, шонымаш-шамычым илышыш шындараш тыланем!

**Марий Эл Республикым Вуйлатыше
Ю.В.ЗАЙЦЕВ.**

Историйым шергалына

★1945 ий 12 январыште совет войска Висло-Одерский операцийым тўжалын да Польшын кугу кумдыкшым фашист тўшка деч утарен.

★Ты ийынак 17 январыште совет салтак-влак Варшавым фашист-шамыч деч утареныт.

Идалыкын озаже

Йоча да самырык-влак-лан В.Колумб лўмеш республикысе книгагудо «Идалыкын символжо – 2024» республикысе конкурсым иктешлен. Йоча-садыш коштыш икшыве-шамыч, школышто тунемше-влак ача-аваштын полшымышт дене, тўрлө материалым кучылтын, мотор, иктыже весыж деч ойыртемалтше драконым ыштеныт. Конкурсыш 213 паша пурен. Жюрилан сенгышым ойыраш неле лийын. Туге гынат тўрлө ийготан-влак коклаште сенгыше-шамычым палемден-ныт. Ончышо-влакат келшыше пашалан йўкыштым пуэ-ныт. Эң ойыртемалтше дра-коным Йошкар-Оласе 13-шо



номеран йочасадын воспитанникше Захар Симаков (снимкыште) ямдылен. Сенгыше-влакым «В царстве Снежной королевы» у ий пайремыште саламленыт.

В.МАМАЕВА.
Фотом книгагудын сайтше гыч налме.

Российысе увер

Тунемше ден студент-влак, «Почва-жизнь» все-российский конкурсышко **30 январь марте** ушныза. Тунемше-влак-лан тестым эртыман да творческий пашам ыштыман. Студент-влак-лан статьям возыман. Тўрыс увер – vsekonkursy.ru сайтшыште.

1-11-ше класслаште тунемше-влакым «Золотое перо» всероссийский конкурсышко ушнаш ўжыт. Тўрлө теме дене паша-влакым вучат. Тўрыс уверым pedakademy.ru сайтшыште ончыза.

Изинек эмганен кушшо **12-18 ияш йоча-влак «Я рисую счастье»** конкурсыш ушнен кертят. Йодмашым да пашам https://vk.com/yamogu_yarisuy тўшкашке колтыман. Эң ойыртемалтше сўретын озажлан пөлек лиеш.

Марий Элысе увер

Ече дене куржта-лаш йөротеда? Тугеже **Марий Турек район Тат-Китнеште 27 январыште спорт туризм дене эртаралтше танасымашке** ушныза. <https://vk.com/public180183574> ссылке дене положенийым ончыза.

9-11-ше да 7-8-ше класслаште тунемше-влакын всероссийский олимпиадыштын регионсыс йыжынже тўгалын. Тудо **29 февраль марте** шуйна. Тўрлө предмет дене олимпиадыште 1000 утла тунемше уш-акылжым терга.

Йоча да самырык-влакын «Движение Первых» российысе толкынжо **«Школьный музей»** всероссийский проектым иктешлен. Российын 18 регионжо гыч 26 сенгыше команде чумырген. Нунын коклаште **Волжск оласе 3-шо номеран школын «Заря»** командыже лийын.



Фотом школ архив гыч налме.

Рошто ёлко

Сотнур селасе черке пелен Рошто пайрем ёлкым эртаренна (снимкыште). Тушко йоча, ача-ава-влак погыненыт. Иерей, Игорь ача волгыдо пайрем дене саламлен. Рошто пайремын историйже дене палыме лийыныт. Йоча-шамыч, кож йыр шогалын, мурым муреныт, почеламутым ойленыт, туштылан вашмутым кычалыныт. Сотнур школышто 4-ше классыште тунемше-влак «Рошто ўяча» йомакым модын ончыктеныт. 3-шо классыште тунемше-шамыч весела муро дене куандареныт. «Мо тыгае Рошто?» сценкым Сапаевмыт еш ямдылен. Йўштö Кугыза ден Лумўдыр чылалан шере пöлекым кучыктеныт.

И.САПАЕВ.

Волжский район.

Йўштö пагыт

Уремыште лум шуко. Игече пеш йўштö. Мыланем тыгай пагыт келша. Уремыште модаш йöратем. Яра жапыште книга лудам. Теле каникул годым яра жап лынак лийын. Рошто ёлкышко ушненам. Тушто почеламутым каласкаленам.

Маша САПАЕВА.
Волжский, Сотнур.



Телым йöратем

Молан телым йöратем? Тыланда мый каласем: Йольшкем коньким чиём, Ий ўмбалне мунчалтем. Чапле ечим чиялам, Курыкышко чымалтам. Молан телым йöратем? Тыланда мый каласем: Лумым ненчаш йöратем, Теле нерген мый возем.

Даша ВИНОГРАДОВА.
Кужэгер, Шўдымарий.

Шорыкйол пайрем

Мый Шорыкйол пайремым пеш йöратем. Кажне ийын ты пайремлан Морко районысо Кораксолаште илыше Роза ковам ден Валерий кочам деке унала каем. Теният ты йўлам шуктенам. Ялыште икмыняр йоча пырля погыненна да Шорыкйол мөчөр лийынна (снимкыште). Кораксола ял мучко коштынна. Кажне пöртыштö мемнам порын вашлийыныт. Мелна, пүкш да моло тамле кочкыш дене сийленыт. Шорыкйол пайрем сай шарнымашым коден.

Регина ГРИГОРЬЕВА.

2-шо номеран Морко школ.



Фотом еш архив гыч налме.



Фотом еш архив гыч налме.

Каныш кечылан Кужэгер районысо Йывансолашке коча-кова деке унала мийымеке, верысе тўвыра пöртын пашаенже-влак мемнам Шорыкйол пайремыш намиеныт (снимкыште). Тудо Йошкар-Оласе Чарла кремльыште эртаралтын. Мыланна мыжерым, портышкемым чиктеныт, шовычым пидыктеныт. «Вургемда чурийланда келша, пеш сöралын койыда» манын, шукын ойленыт. Моло дене пырля марла куштенна, модынна. Мый агытан дене мужедынам. Тыгай пайремыш вес ганат ушнаш кумыл уло.

Дарья ГУБИНА.
Йошкар-Ола, 19-ше номеран школ.



Тоштерым ушештарыше клат

Шочмо кундемым йораты-маш шочмо ял гыч огыл, родо-тукымым, нунын илемыштым шымлымаш гыч тўнгалеш. Кужангер район Шорсола школышто 9-ше классыште тунемше Евгения Дмитриева (снимкыште) «Историческое строение в усадьбе Дмитриевых» пашам возен.

– Еш фотоальбомым лаштыккышмемла, кочамын пёртшын фотожо шинчамлан перныш. Тудо пеш ойыртемалтшыла чучо. Кок пачашан клат кудывечыштына кызытат шога. Кё тудым чоен, историйже могайрак? Нине йодыш-влаклан вашмутым муаш манын, шымлаш пижым, – ойла Евгения.

Клатын икымше пачашыштыже ожно киндым, шурным, пакчасаскам, шёр-торыкым араленыт, кокымшыштыже малыныт, вургемым оптеныт. Оралтын кугытшо, пёрткөргө ойыртемышын поянлыкше деч шоге-ныт. Марий калыкын клатше йўла денат чак кылдалтын.

Сўан кечын оръеным тушто чиктеныт. Кузыкшат (шондык, кўпчык, тўшак) тушто аралалтын. Качын суртышкыжо ўдырым кондымеке, уна-влактыге муреныт: «Ужар выныкым конден улына, кудо каштам пуэда? Мотор ўдырым конден улына, кудо клатшым пуэда?»

– Кок пачашан клатнам иктаж 1897 ийыште Максим Антонович Дмитриев чоен. Жап эртымекке, оралте эргыже Иван Максимовичлан кодын. Кызыт тудлан Йыванын уныкаже, Владислав Анатольевич, вуйын шога. Клатым пўнчө пырня гыч чоьымо. Кажне



пачашыште – 11 пырня. Тачысе кечылан тушто ухват, лар гыч шурным опташ келыштарыме пугольмо, кўнчылавондо, шондык, ёранвочко да молат аралалтыт. Клат чылт тоштерым ушештара, садлан «Экскурсия в марийскую усадьбу» турист маршруттым ышташ шонем. Ончыкыжым тудын дене калыкым палдараш тўнчалам, – ойла Евгения.

Х.АЛЕКСАНДРОВА.

Кандашпак ялем

Шочмо ялем изи гынат, мотор верыште верланен. Ковамтыге ойла: «Ожно тиде ялым Овда карген, маныт. Тек тыште кандаш сурт деч шуко ынже лий, манын». Ожныжо ялна кугу лийын, а кызыт лачшымак кандаш сурт гына кодын. Школыш коштышжат мый веле улам. Мыланем тыште илаш келша. Идалыкын кажне пагытыштыже шочмо ялем сьораллыкше дене куандара. Кажне еглан шочмо мландыже шерге, эн лишыл да йоратыме. Мыят ялем дене кугешнем.

Игнат ЯНАЕВ.

У Торъял район.

Поян полат

Шереметев замокышто лийме жапым эре порын шарнем. Тудо мыланем келшен. Тыгай кугу-у полат! Чылажымат ёрын да куанен онченам. Ожно поян-влак тыгай чапле замокышто иленыт. Мо гына тушто уке! Тынар шуко пөлем, каныме да кочмо верла, библиотеке да молат. Окна-шамыч кўкшө да кугу улыт. Тушко эше каяш шонем.

Ксения ЕГОРОВА.

Морко, Коркатово.



Изольда ЧЕРЁМИНАН сўретше. Медведево, Руэм.

Марий Эл Республикын чекше дене походыш тарванаш шонедат гын, йодыш-влаклан вашештыза.

1. Марий Эл Республикын чек кужытшо могай?
2. Ик шагатыште 5 километрым ошкылыда гын, мынар жап гыч мөнгеш пёртылыда?

Чон коршта

Шочмо Азьялем Кугу Шале деч вич менге тораште верланен. Ялем шым уремман. Мый Комсомольский уремыште илем. Тудо ожнысек тўнлан шотлалтеш. Молан тыгай лўмым нумалеш? Серызе Элнет Сергей (Сергей Архипович Краснов) шке жапыштыже ялыште комсомол ячейкым чумырен. Самырык-влакым у пашашке кумылан ден. Очыни, тидым шарнен, тыгай лўмым пуэныт. Ялна шым уремман гынат, калык шагал: иктаж шўдө наре енила. Самырык-влак кугу олашке каят. Ялна иземеш, сурт пустангеш. Чон коршта, но тиде илыш.

Виктория ИВАНОВА.

Морко район.

Лум йымалнат илат



Пушенге ден кушкыл-влак кислородым луктыт. Юалге игече толмеке, пеледыш, шудо кошкат, нӧрен шӱйт. Пушенге лышташлажым «кудашеш». Телым чыланат лум дене леведалтыт. Туге гынат шошым уэш ылыжыт, кузе тыге? Палаш онгай, телым кислород кушеч лектеш? Нине йодыш-шамычлан вашмутым Юрино район Марьино школышто биологийым да химийым туныктышо, «Идалыкын туныктышыжо» республикысе конкурсышто сенгыше В.В.Дружинина (снимкыште) пуа:

– Кушкыл-влак шошо марте огыт коло. Клеткышт



Фотом еш архив гыч налме.

ден тканьышт йӱштылан келыштаралтыт. Лышташ-лаштышт вӱд иземеш. Шке семьинышт малат. Тыге кӧргыштышт ий ок нал. Пушкыдо лум нунын вожыштым арала, йымалне левырак южым куча. Южо кушкылын вожшо кутышеш кушкеш, мланде йымак ок кай. Тидат полша. Икияш пеледышын вургыжат, вожшат пытат. Но саскаж ден нӧшмыжлан кӧра шошым уэш лектеш. Шукияш кушкыл-влак паренгыштлан кӧра илен кодыт.

Лышташ-влак йогат, кушкыл-шамыч малат гынат, кислород телым 0,01 процентлан веле иземеш. Мландын ик полушарийыштыже шошо озалана гын, вес вере – кенеж. Тыге кислород тӱня мучко шарла. Миллион ий жапыште шапашыжат ятыр погынен шуктен. Тыгак иман пушенге-влак кислородым идалык мучко луктыт. Вӱдысӧ кушкылынат (водоросль) надырже кугу. Садлан ме кенежымсе семьинак куштылгын шӱлен кертына.

Х.ТОКПУЛАТОВА.

Полышым вучат

Кундемыштына теле озалана. Уремыште йӱштӧ. Йырымваш ошо. Пушенге-влакат лач тыгай тӱсан вургемым чиен шогалыныт. А чодыраш кает гын, йомакыш логалмыла чучеш. Телым шуко янлык кана. Маска вынемыштыже мала, вийым пога. Меран сур тӱсан ужгажым ошыш вашталтен. Лум пургыжыш шылын вочмыж годым сур пылышыже веле койылалта. Пасушто чоя рывыжым чӱчкыдын ужаш лиш. Тудо колям кычалеш. Лум келгылан кӧра муашыже йӧсӧ. Кайык-влаклан кормушкым сакален, тушко пырчым, шӱрашым, кечшудым але коям пыштыман.

Шулдыран йолташ-шамычлан, янлык-влаклан йӱштӧ пагытыште полшыман. Жап шумек, нуно тауштат.

Вероника МАМАЕВА.

У Торъял, Кузнеч.



Ош теле



Мардеж, ош лумым пуалын, Кундемым лум дене леведалын. Но теле чодыра ок мале, Кеч шуко янлык

шинчын шылын.

Анжелика БУЛЫГИНА.

У Торъял школ.

Тушто

Ой, ош лыве шуко лектын, Петыренак кавам кертын. Мландымбалне – ош тӧшак, Мунчалташ келша пешак.

Поро паша

Теле пагытлан ме куаненна. А кайыклан илаш нелырак. Сандене ме полыш кидым шуялтышаш улына. Тиде мемнан порысна. Шулдыран йолташ-влак кенежым сылне мурышт дене куандарышт, сад-пакчанам шукш-копшанге деч аралышт. Ачам дене тыгай чапле кайык ӱстелым ыштышна (снимкыште). Тушко кажне кечын кочкышым пыштем. Теат, йоча-влак, поро пашам ыштыза.

Валерия ЕФИМОВА.

Морко, Коркатово.

Фотом еш архив гыч налме.

Палаш онгай

Рывыж кочкышлан янлыкым поктыл ок кудалышт. Тудо чоя, тӱрлӧ йӧным кучылт мошта. Рывыжын пылышыже пӱсӧ, пушым тора гычак шижеш. Телым ик метр келгытан лум йымалне тарванылше колям колеш. Идалыкын моло пагытыштыже коля пушым шижеш гын, йолжо дене мландым чот пера.



Калыкмутым шарналтыза

❖ Ӧрш ок лий гын, теле ...
❖ Ӧрш ... – лумлан, поранлан.
❖ Ӧрш – ... икымше кайык.



Семүзгарлан «Илышым пөлекла»

Марий калык семүзгарлан поян. Поснак ожно нимогай пайрем семүзгар деч посна эртен огыл. Кушталташ таратыше гармонь, ныжыл йўкан шиялгыш, торашке йонгалтше тōтыретпуч, марий койышым ончыкташ кумыландыше шўвыр, тўмыр да шўшпык кажнылан пайрем шўлышым, весела кумылым пуртат. Марий тўвырам, тошто семүзгар-шамычым арален кодаш шонышо-влак кокла гыч иктыже — Кужэңер район Йывансолан шочшыжо, «Мурсескем» калык фольклор ансамблын чолга енге Иван Каменщиков (снимкыште). Тудын тошто марий семүзгарым шокталтымыжым концертыште, вашлий-маште, тыгак интернет лаштыклаште чўчкыдын ужаш лиеш. Мастерлык-класс-влакым эртара. Моско олаште эртаралтше «Россий» ончер-форумышто Иван дене вашлиймашыш шуко ег погынен.

— Иван, икымше ыштыме семүзгарет могай лийын?

— Изиэм годым кенежым мамыкшудо гыч пуч гай семүзгарым ышташ йōратенам. Кужурак вондым ойырен налын, ангысыр мучашыжым темдалын, тушко шыман пуалынам. Шўвырым шарныктыше йўк лектын. Варажым вондо мучко икмыняр рожым шўтенам. Нине рож-шамычым темдыштын, куштылго сем-влак лекташ тўналыныт.

— Ты пашам шуаш мо кумыланден?

— Олаш тунемаш кайымеке, палыдыме да мондалтше ятыр семүзгар нерген пален налынам. Икмыняр тошто семүзгаржым шоктен моштышыжат лийын огыл. Кузе тудым кучыман, могай йўкым луктеш — чылажат онайын чучын. Книгалаште материалым кычалын, кугурак ийготан-влак деч йодыштын да нунын дене канашен ыштен онченам. Писте пум налынам, пўчкынам, кōргыжым коранденам,

кок пелым ваш ушен, куэ кумыж дене пўтырен шын-денам. Пуалтарен колтымекем, изи йочала йывыртенам. Тудо кўлеш йўкым луктын. Умбажыже тидын шотышто пашам шуаш эшеат чот кумылем лектын.

— Тачысе кече марте могай семүзгарым ыштенат?

— Книгалаште ончен, муро фестивалылашке коштын, вес калыкын семүзгаржым колыштын, марий-влакынат сōрал, ойыртемалтше семүзгарна уло манын, эреак шоненам. Уло да шагал. Садланак чон йўлен тошто семүзгарым уэмден ышташ пижынам. Тыге арама шўшпык, олым шўвыр, тōтыретпуч, кон-кон шочыныт.

— Семүзгар-влакым шымлыме годым кōн возымыжлан энертет?

— Палантай лўмеш тўвыра да сымыктыш колледжыште тунеммем годым тўрлō семүзгар дене шоктенам. Кажныже шке семынже онай. Мыланем тошто семүзгар-влак поснак лишылын



Фотом еш архив гыч налме.

чучыныт. Нуным кушто да кунам кучылтмым пален налмем шуын. Олег Герасимовын «Традиционные музыкальные инструменты народа мари» книгаж гыч шуко умумыленам. Тыгак Яков Эшпайын «Национальные музыкальные инструменты марийцев» да Пётр Никифоровын «Марийские народные музыкальные инструменты» книгаштлан энертет.

В.МАМАЕВА мутланен.



Фотом школ архив гыч налме.

Ме, марий-влак, кугезе тукумнан тўвыражым, йўлажым шерге поянлык семын перегышаш да аклышаш улына. Кужэңер район Йўледўр школышто тўналгыш класслам туныктышо-влак, тидым шотыш налын, йоча-шамычым марий тўвыра, йўла деке изинек шўмандена. Пырля погынен, тўрлō пайремым эртарена. Аван кечыжлан А.Юзыкайнын «Изий» йомакше почеш инсценировкакым тўшкан модын ончыктенна (снимкыште). Тунемше-шамыч кугезе коча-кова-влакын сурткōргыштō кучылтмо йыравочкышт, пурагоркашт, туйысышт, йолорвашт, марий тўран солькышт дене палыме лийынат. Йоча-шамыч сўан йўлан ойыртэмже нерген уш-акылыштым пойдареныт. Калык мурым муреныт, куште-ныт. Пайрем кажнын кумылжым нōлтен.

З.Н.БИРЮКОВА, Э.И.ЯКИМОВА.

Онайын эрта

Туныктышо! Сылнын, ны-жылгын йонгалтше шомак. Лач тыгай мыйын кокымшо авам – Елена Вячеславовна Васильева. Урокшо-шамыч кеч-кунамат онайын эртат. Иктыже весыж деч ойыртемалтеш. Ме лудына, возена, түрлө заданийым ыштена, задачылан вашмутым кычалына. Мужыр, тўшка дене, шкевуя пашам ыштена. Модышла дене модына. Йокрокланаш жап уке.

Ксения МАКСЮТОВА.

Волжский, Карай.

Фокус

Шөр гыч модыш

Кўлеш: кастрюль, 1 стакан шөр, кагаз солык, 1 кугу совла уккус, шокте.

Шорым ырыктыза, тушко уккусым ешарыза. Нугыдем-мешкыже, сайын лугыза. Вара шокте гоч колтыза. Шоктеш кодшо вартышым кагаз солыкыш опталза. Ты вартыш гыч модышым ыштыза да кок кечылан кошкаш кодыза.



Ялысе книгагудо

Мый Ты-гыде Морко ялыште илем. Ялна кугу огыл гынат, книгагудо уло. Мый тушко кошташ йоратем. Библиотеке



Фотом книгагудын архивше гыч налме.

түрлө сынан книгалан поян. Мыланем йомакым лудаш келша. Англичан писатель Энид Блайтонын «Знаменитый утенок Тим» йомакшым шукерте огыл лудын пытарышым.

Книгагудым вуйлатыше Лидия Александровна шуко модышым пала. Мемнам, йоча-влакым, эре модыкта (**снимкыште**). Яра жап лийме годым книгагудышко тўшкан погынен каена.

Анна МАМАЕВА.

Морко район.

Электротулым аныклена

- Лампычкым энергосберегающийлан вапталтыза.
- Кайымыда годым тулым йортыза.
- Электрочайникын йошкынжым эрыктыза.
- Холодильникым батарей воктек ида шынде.
- Тувраш ден пырдыжым ош чия дене чиялтыза.

Калык пале



- Корак йўштылан нержым шулдыр йымакыже шылта.
- Шўдыр-влак огыт чолгыж гын, игече лывырта.

М.ШКЕТАН ЛҮМЕШ МАРИЙ КУГУЖАНЫШ ДРАМЕ ТЕАТР

МЫЙ ПӨЛЕКЛЕМ ЫЛЕ...

27/01 16:00

Вячеслав Абукаев-Эмгакым шарныме лүмеш концерт

12+ 78-13-78

М.ШКЕТАН ЛҮМЕШ МАРИЙ КУГУЖАНЫШ ДРАМЕ ТЕАТР

Толынам тўняшке

27/01 13:00 ЦЕХ-ЗАЛ

Иван Соловьёвын лүмгече концертше

12+ 78-13-78

Сўретым чиялтыза.

«Ямде лий» газет
Тўн редактор
Л.Н.ГРИГОРЬЕВА.
Индекс: П4696.
Тираж 1550 экз.
Заказ
Формат – А-4-8.

https://vk.com/yamde_lii
<https://t.me/yamedelii>
E-mail: yamde_lii@mari-el.ru
(документ кагазлан),
yamde_lii@mail.ru
(автор-влаклан)
Сайтын адресше: ямделий.рф

УЧРЕДИТЕЛЬ-ВЛАК:
Марий Эл Республикысе Тўвыра, печать да калык-влакын пашаш шотышто министерстве, Марий Эл Республикысе «Марий Эл» савыктыш пёрт» КАУ.

Газетым редакцийште погымо да верстатлыме, «Марий Эл Республикысе Правительствын типографийже» ООО-што ямде оригинал-макет гыч савыктыме. Типографийн адресше: 424000, Йошкар-Ола, Комсомольский урем, 112.

Газетым Кыл, информационный технологий да массовой коммуникаций сферым эскериме шотышто федеральный службын Юл кундем федеральный округысо управленийшытже регистрироватлыме.

Номер – ПИ № ТУ52-01404,
2023 ий 22 сентябрьште пуымо.

0+

Печатьш пуымо жап – 14-00, фактически – 13-00

Авторын да редакцийн шонымышт түрлө лийын кертыт. Серыш-влак мӱнгеш огыт колталт. Ак – кутырен келшыме почеш.

Редакций да издатель: **Марий Эл Республикысе «Марий Эл» увер агентстве» КАУ.** Директор – **Е.И.КУЗНЕЦОВ.** Редакцийн да издательнын адресше: 424006, Йошкар-Ола, СССР Вооружённый Вийын 70-ше идалыкше урем, 20-шо пёрт. Тел. 8(8362) 45-22-82.

У КОНКУРС



Ксения ТОКТАРОВА.
Медведево, Знаменский.

Идалыкын кажне пагытше пашке семынже сөрал да онай. Туге гынат теле йоча-влаклан утларак лишылла чучеш. Тыгодым ўдыр-рвезешамыч йолташ-влак але еш дене курык гыч ече, издер, ватрушко дене мунчалтат. Але теле пўргўсым эскераш чодыраш вашкат. Лум гыч тўрлў фигурым ненчат, модыш орым, пўртым келыштарат. Шочмо Марий кундемын але Российын ўрыктарыше верлаж дене палыме лийыт. Теле канышым пайдалын да веселан эртарыме жапдам моторын войзен, фотографийда-влакым «ВКонтакте» соцкылысе «Ямде лий – марла йоча газет» тўшкашке сообщений дене колтыза. Эн шуко лайкым погышо постын озаже сенгышыш лектеш. Тўткў лийза. Йўклышў группын подписчикше лийшаш.

Ешартыш лайкым кузе погаш?

400 лайк: 2024 ийын икымше пелийжылан «Ямде лий» газетлан почто гоч подпискым ышташ да квитанцийжым але тудын копияжым редакцийышке колташ.

200 лайк: электрон подпискым ышташ. 89027382237 номеран телефон дене Сбербанкыш оксам колташ але тиде номерышке 150 тенгем пышташ. Электрон почтыдан адресшым возен колташ ида мондо. Редакций гоч подпискым ыштышат тынарак лайкым налеш.

100 лайк: фотода пелен канышда нерген заметкым возаш. Пашада-влакым газет лаштыклавш савыктена.

Ушештарена:

мыняр шукрыак подпискым ыштеда, тунар шукрыак лайкым погаш йўн лиеш. Тугеже газетлан возалташ родо-тукымдамат ушен кертыда.

Сенгышым чапле пўлек вуча.

Пашадам 1 март марте вучена.



Тугшо

*Лу гыч лум налат гынат, луак кодеш.

*Ок коч, ок йў, а шкеже ковыра.

– Машук, могай янлык эн йолагай манын шонет?
– Кишке.
– Молан?
– Тудо кийышыла шинча, кийышыла коштеш, эсогыл кийышыла кочкеш!



Шонгылан мўнгыжў миен шуаш полшыза.





Синквейн



Кишке
Йўштў, кужу.
Нушкеш, чушла, чўнгалеш.
Осалланаш йўратыше.
Нушшо янлык.
Аделина ПОЛУШИНА.
Советский, Ўрша.

Сўретым ончен, клеткылам чын чиялтыза.



Мужырым кычалза.



Сўретыште кычалза.

Интернетысе сўрет-влакым кучылтмо.